



**REPUBLIKA E SHQIPËRISË
KUVENDI**

LIGJ

Nr. 31/2015

**PËR DISA NDRYSHIME DHE SHTESA NË LIGJIN NR. 10 019, DATË 29.12.2008
“KODI ZGJEDHOR I REPUBLIKËS SË SHQIPËRISË”, TË NDRYSHUAR**

Në mbështetje të neneve 81, pika 2, 83, pika 1, dhe 84, pika 4, të Kushtetutës, me propozimin e një grupi deputetësh,

K U V E N D I

I REPUBLIKËS SË SHQIPËRISË

V E N D O S I:

Në ligjin nr. 10 019, datë 29.12.2008, “Kodi Zgjedhor i Republikës së Shqipërisë”, të ndryshuar, bëhen këto ndryshime:

Neni 1

Në nenin 27 bëhen këto ndryshime:

1. Në pikën 2 bëhen ndryshimet si më poshtë:

a) Fjalja e parë dhe e dytë e pikës 2 ndryshohen si më poshtë:

“2. Juridiksioni territorial i ZAZ-ve, si rregull, është i njëjtë me territorin administrativ të bashkisë, sipas ligjit që rregullon organizimin administrativ-territorial të Republikës së Shqipërisë. Bashkitë që kanë më shumë se 80 mijë shtetas me të drejtë vote ndahen nga KQZ-ja në më shumë sesa një Zonë të Administrimit Zgjedhor, në përputhje me kriteret e mëposhtme:”

b) Shkronja “a” ndryshohet si më poshtë:

“a) pandashmëria e territorit të njësisë administrative, përjashtuar ato me më shumë se 80 mijë zgjedhës;”

2. Në pikën 3, togfjalëshi “apo rrethe të ndryshme brenda të njëjtit qark”, hiqet.

3. Pika 4 ndryshohet si më poshtë:

“4. Për Bashkinë e Tiranës, secila nga njësitë bashkiake përbën Zonë Administrimi Zgjedhor më vete.”

4. Në pikën 5, fjalja e fundit ndryshohet si më poshtë:

“Jo më vonë se 10 muaj para mbarimit të mandatit të Kuvendit, Drejtoria e Përgjithshme e Gjendjes Civile i dërgon të dhënat KQZ-së, të ndara sipas njësive të qeverisjes vendore dhe njësive administrative të përfshira në to.”

5. Në pikën 6, fjalët “sipas pikave 2, 3 dhe 4 të këtij neni” zëvendësohen me fjalët “sipas pikave 2 dhe 3 të këtij neni”.

Neni 2

Në nenin 45 bëhen këto ndryshime:

1. Në pikën 1 shtohet shkronja “f” me këtë përmbajtje:

“f) gjinia”.

2. Në pikën 2, fjalia e dytë ndryshohet si më poshtë:

“Lista që përdoret nga KQV-ja në procesin e votimit përmban përbërësit e përcaktuar në shkronjat “a”, “ç”, “d”, “dh” dhe “f”, të pikës 1, të këtij neni.”.

Neni 3

Në nenin 48 bëhen këto ndryshime:

1. Në pikën 1, pas fjalëve “zonës zgjedhore” shtohen fjalët “njësinë e qeverisjes vendore, njësinë administrative”.

2. Në pikën 2, shkronjat “b” dhe “c” ndryshohen si më poshtë:

“b) listë zgjedhësish në formë të printuar për përdorim nga KQV-ja në procesin e votimit, e ndarë sipas qendrave të votimit dhe që përmban përbërësit zgjedhorë të përcaktuar në shkronjat “a”, “ç”, “d”, “dh” dhe “f”, të pikës 1, të nenit 45. Ky format përmban edhe hapësirën për shënimin e numrit të dokumentit të identifikimit dhe nënshkrimin nga vetë zgjedhësi gjatë votimit;

c) përmbledhje e të gjithë zgjedhësve në formë elektronike, printuar nga Drejtoria e Përgjithshme e Gjendjes Civile, në nivel zone të administrimit zgjedhor, sipas llojit të zgjedhjeve, me përbërësit zgjedhorë, të përmendur në shkronjën “a”, të këtij neni, i cili përdoret nga KZAZ-ja për informim të zgjedhësve;”.

Neni 4

Në nenin 62, pika 8 shfuqizohet.

Neni 5

Në nenin 67 bëhen ndryshimi dhe shtesa e mëposhtme:

1. Pika 3 ndryshohet si më poshtë:

“3. Në zbatim të paragrafit të dytë, të pikës 1, dhe paragrafit të dytë, të pikës 2, të këtij neni, kandidati për kryetar bashkie dhe listat për këshillin e bashkisë, territori i të cilave nuk mbulohet nga një KZAZ e vetme, regjistrohen në KQZ.”.

2. Në fund të pikës 6 shtohet një paragraf me këtë përmbajtje:

“Për zgjedhjet e organeve të qeverisjes vendore, për çdo këshill bashkie, një në çdo dy emra të njëpasnjëshëm në renditje duhet t’i përkasë së njëjtës gjini. Subjekti paraqitës i listës deklaron vendet, sipas kuotës gjinore, me qëllim zbatimin e përjashtimit, sipas paragrafit të dytë, të pikës 2, të nenit 164, të këtij Kodi.”.

Neni 6

Në nenin 94 bëhen këto ndryshime:

1. Në pikën 1, fjalët “bashkinë qendër rrethi” zëvendësohen me fjalët “bashkinë qendër qarku”.

2. Fjalja e parafundit e pikës 2 ndryshohet si më poshtë:

“Një vend numërimi votash nuk mund të ketë më pak se 3 dhe më shumë se 10 tavolina numërimi.”.

Neni 7

Në nenin 97, pika 3 shfuqizohet.

Neni 8

Në nenin 104, pika 3 shfuqizohet.

Neni 9

Në nenin 116, fjalja e dytë e pikës 1 shfuqizohet.

Neni 10

Në nenin 120 bëhen këto ndryshime:

1. Pika 1 ndryshohet si më poshtë:

“Për zgjedhjet për organet e pushtetit vendor, KZAZ-ja i vendos kutitë e votimit të grupuara, sipas organit përkatës.”.

2. Pika 2 ndryshohet si më poshtë:

“2. Për çdo bashki, numërimi fillon me votat për kryetarin dhe më pas vijon me numërimin e votave për këshillin përkatës.”.

Neni 11

Në nenin 122 bëhen këto ndryshime:

1. Pika 5 ndryshohet si më poshtë:

“5. Në rast të zgjedhjeve vendore, KZAZ-ja miraton me vendim Tabelën Përmbledhëse të Rezultateve të bashkisë. Në rastet kur territori i bashkisë nuk mbulohet nga një KZAZ e vetme, çdo KZAZ miraton me vendim Tabelën Përmbledhëse të Rezultateve për atë pjesë të territorit të bashkisë. Në çdo rast KZAZ-ja zbaton të njëjtat kritere dhe procedura të përshkruara në këtë nen. Vendimi ankimohet sipas procedurave të përcaktuara në pjesën X të këtij Kodi.”.

2. Pika 6 ndryshohet si më poshtë:

“6. Kopja origjinale e Tabelës Përmbledhëse të Rezultateve të KZAZ-së dhe Tabelat e Rezultateve për çdo qendër votimi i dërgohen KQZ-së për të nxjerrë rezultatin, sipas nenit 123 të këtij Kodi.”.

Neni 12

Në nenin 164, në pikën 2, pas fjalëve “Mandati i ndërprerë” shtohen fjalët “i deputetit ose i anëtarit të këshillit të bashkisë”.

Neni 13

Në nenin 175, pika 1 ndryshohet si më poshtë:

“1. Mospërmbushja nga ana e subjektit zgjedhor e detyrimeve të parashikuara në pikën 6, të nenit 67, të këtij Kodi, në lidhje me përbërjen e listës, dënohet nga KQZ-ja me gjobë 1 000 000 lekë si dhe sanksionin plotësues, sipas pikës 2 të këtij neni, në rastin e zgjedhjeve për Kuvendin, dhe me refuzimin e listës së partisë politike të kandidatëve për këshillat bashkiakë, për zgjedhjet për organet e pushtetit vendor.”.

Neni 14

Neni 177 shfuqizohet.

Neni 15

Neni 180 ndryshohet si më poshtë:

“Neni 180

Ndarja e zonave të administrimit zgjedhor

Për zgjedhjet e vitit 2015 për organet e qeverisjes vendore, zonat e administrimit zgjedhor përcaktohen në Aneksin 1 të këtij Kodi, bazuar në numrin e zgjedhësve për zgjedhjet për organet e qeverisjes vendore të datës 21 qershor 2015.”.

Neni 16

Pas nenit 180 shtohet neni 180/1 me këtë përmbajtje:

“Neni 180/1

Për zgjedhjet e vitit 2015 për organet e qeverisjes vendore, përgjegjësitë dhe detyrat e parashikuara në Pjesën III “Zgjedhësit dhe përgatitja e listës së zgjedhësve” të këtij Kodi, për Bashkinë e Tiranës do të kryhen nga kryetarët e njësisve bashkiake të Tiranës.”.

Neni 17

Në nenin 184, shtohet pika 3 me këtë përmbajtje:

“3. Përfundimisht për zgjedhjet për organet e qeverisjes vendore të vitit 2015, afatet e parashikuara në nenin 28 e në vijim të Kodit Zgjedhor, të cilat nuk mund të zbatohen, ngarkohet KQZ-ja për miratimin e tyre me vendim, menjëherë me hyrjen në fuqi të këtij ligji.”.

Neni 18

Në të gjithë tekstin e ligjit, fjalët “komunë”, “kryetar komune”, “këshill komune”, hiqen.

Neni 19

Ky ligj hyn në fuqi menjëherë.

K R Y E T A R I

Ilir META

Miratuar në datën 2.4.2015